

## Rediidx Nani Bacuaa Juan Xcuent Recos Ni Churu Gac

### *Baluiloj Jesucrist lo Juan*

<sup>1</sup> Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhaļ xanglni lo Juan, te baluiini guiraa recosga lojni.

<sup>2</sup> Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

<sup>3</sup> Chicbaa renani roļ guijtze xcuent recos ni churu gac, renani riuza rediidxga, renani rguchee rediidxga nen lastooni sa'csi siäddzunğajxh redxej che soob rediidxga.

### *Juan cagucuaa guijtze lo gajdz guidoo*

<sup>4</sup> Narä nacä Juan. Cagucuaä guijtze loj guigajdz reguidoo ni tre' lo región Asia. Dios gupalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälrupalajz näj xcälrbedxilajz guigajdz respriit ni suga' guideb gabi cadro rnibeeni,

<sup>5</sup> näj xcälrupalajz, xcälrbedxilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojl̄nu con xtiejnii.

<sup>6</sup> Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

<sup>7</sup> ¡Colgacbee! Laani sibisacni lo rexcäjy, luxh guiragajc rebejn suhii lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

<sup>8</sup>—Narä nacä ganid, nacäza lult, si'c najc reletr A con Z —rnii Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

*Bahuiä loj Jesucrist lo xcälrdimbicha'ni*

<sup>9</sup>Narä, Juan, bejztu, näjza ni cadednäjtu trabajw xcuent Jesucrist, ni riunäjzatu cadre rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre.

<sup>10</sup> Te dumingw, laļ ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet,

<sup>11</sup> najni loä:

—Narä nacä ganiddoo, nacäza lult. Lo te guitro bacuaa nani fiilu, dxejcti baxhal guijtzga loj guigajdz guidoo ni yu' nez Asia, neņ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor.

<sup>13</sup> Galäii guigajdz recandilieerga, suga' te ni najc Xi'n Dios nani gujc Xi'n Niguui, najcwni te lajd ni rdzujn lo ni'lini, lastoozani naliib te cinturon gulajg ni najc ganaxduj oor.

<sup>14</sup> Yejcni nájza xquidxejcní najczareni nolbäj si'c xquichlajd xiil, nolbäj si'c yejg. Dxejcrú rbebajl lojni.

<sup>15</sup> Ni'ni rdimbicha' si'c guiib ni laa bronz che cayejcní lo guiboo. Xse'ni riejn nadipduxh astoo che riäjť nisro nen regueuu.

<sup>16</sup> Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

<sup>17</sup> Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejblu, narä nacä ni gubajñ galooli, narä nacäza ni guibajñ lult.

<sup>18</sup> Narä nacä ni nabajñpac; gutä, niluxh naj nabanä par tejpas. Rapä yälñibee lo yälgujt nájza lo gabijl.

<sup>19</sup> Ni'cni bacuaa recos ni abahuiilu, nani cayajc naj, nájza nani churu gac.

<sup>20</sup> Dee najc laa yälxhiga'tz xten regajdz balxhaguibaa ni bahuiilu lo naä ladbee nájza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

## 2

*Rediidx nani chää loj rexpejn guidoo Éfeso*

<sup>1</sup> Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani lad-bee, näjza nani rsiaj galäi guigajdz gandilier oor, rni rediidxre lojtu:

<sup>2</sup> Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu beñlatsiaj; näjza bala'tztu xho rujn rebejn nani rniireni najcreni apost ni rni xtidx Dios, luxh direni gac, luxh la'tu gucbegajtu cagusgueereni bejn.

<sup>3</sup> Rsiudzu'tztu, rujntu huant xcuent xtidxä, gajdtu guidxajg.

<sup>4</sup> Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo.

<sup>5</sup> Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechla-jztu, sudzucaä xcandilieertu cadre suga'ni.

<sup>6</sup> Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni.

<sup>7</sup> Nani yu' diajgni te cuadiajgni diidx, sucuadia-jgni diidx ni rni Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäñabajn, ni yu' xhaguibaa cadre yu' Dios.”

*Rediidx ni rniini loj rexpejn guidoo ni yu' Esmirna*

<sup>8</sup> Dxejcti najn loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rni diidxre lojtu:

<sup>9</sup> Narä nanä xho cadejdlu trabajw, nanäza gux-ili rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz beñdxab.

<sup>10</sup> Na'c guidxejblu trabajw nani agojl tedlu. Aree beñdxab gusäl gaii sa'tu neñ latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl'nabajn.

<sup>11</sup> Nani rlajz cuadiajg diidx sucuadiajgni diidx ni rnii Sprit Dxañ xten Dios loj reguidoo: nani gun gaan lo dojl, xhet gundi yäl'gujt ni rojpga lojni.”

*Rediidx ni rniini lo rexpejn guidoo ni yu' Pérgamo*

<sup>12</sup> Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu:

<sup>13</sup> Narä nanä caro rbäjztu, rbäjztu lo guejdx cadro rnibee Beñdxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadro rnibee Beñdxab.

<sup>14</sup> Niluxh yu' tiop-choñ xtojltu. Lojtu nadxaag gaii bejn ni rujñ si'c bejn toBalaam agujc xchero. Laani basedni Balac xho gunni te jiajb rexpejn Israel neñ dojl, basednireni gaurení recos ni gurej lo dxan nez loj rebanäjb, basedzani rexpejn Israel guesnäjreni chutis gunaa.

<sup>15</sup> Sigajcza nadxaag lojtu gaii bejn ni riu rediidx ni rusule' reni laa nicolaítas.

16 Colgusiechxgaa lajztu, te di jiälgacä lojtu te gucuanääreni spaad ni yu' ro'ä.

17 Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibáz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

*Rediidx nani rniini lo rexpejn guidoo ni yu' Tiatira*

18 Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu:

19 Ananá xtzuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu.

20 Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rus-gueetisni bejn. Luxh xcäl'ruseedni cagusgueeni rexpenä nani ahuililajz xtidxä, te naj rujnreni cos-guijdx, si'c yälresnäj ni di gac chäälni, rajwzareni nani gurej lo dxan xten rebanäjb.

21 Aguläzä xchej te gusiechlajzni, gusaanni gunni dojl, luxh naaddini gusiechlajzni xcuent redzunguijdx ni rujnni.

22 Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni

dzunguixdx palga direni gusiejch lajzreni, palga direni guchaa xmoodreni.

<sup>23</sup> Sugutxhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexpigab ni yu' xcäriejnreni, näjza yälrlilajz ni yu' neñ lastooreni. Te gacbeezareni narä sunidxä lo tejgatu ni riäj<sub>l</sub> xca'tu xcuent redzuun ni rujntu.

<sup>24</sup> Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten beñdxab, xhetru rniädi lojtu, dirinä gutalä xtzuuntu.

<sup>25</sup> Colyapdzu'tz rextidxä nani arajptu dxejli ni guibisacä lojtu.

<sup>26</sup> Nani gun gaan lo dojl, näjza nani cagu-soob xtidxä dxe lultli, lojni sudedä yälrnibee te guinibeeni renacion.

<sup>27</sup> Si'cni baniidx Xtadä yälrnibee loä, sudedä yälrnibee lojni, te guinibeeni guiraa reben guedxliuj, gunnäjni yäl<sub>g</sub>uxhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi.

<sup>28</sup> Sunidxäza bale' xhaguibaa ni rii rsildoo (ni säloj guiban<sub>n</sub>äjnu Dios).

<sup>29</sup> Nani rlajz cuadiajg sucuadiajgni diidx ni rni Sprit Dxan xten Dios loj reguidoo.”

### 3

*Rediidx nani rniini lo rexpejn guidoo ni yu' Sardis*

<sup>1</sup> Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä.

<sup>2</sup> Colguibajn, colgula'tzru nani rapsijctu xcuent rextidxä nani ameer nitloj neñ lastootu. Narä ruhuiä ditu niunsa'c dzuun xtenä nez loj Dios.

<sup>3</sup> Colgusnaj lajztu rediidx ni basule'reni lojtu, nani abacuadaiajgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu.

<sup>4</sup> Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjreni.

<sup>5</sup> Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadre caj laj renani sibajnnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejnga najc rexpänä.

<sup>6</sup> Nani rlajz cuadiajg diidx, sucuadiajgni diidx ni rnii Sprit Dxiän xten Dios loj reguidoo.”

*Rediidx nani rniini lo rexpejn guidoo ni yu' Filadelfia*

<sup>7</sup> Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäii toDavid (ni säloj guiragajc yälrnibee), nani che ruxhalni, rut rusäuudi, nani



che rusäuuni, rut ruxhaldi, laani rniini diidxre lojtu:

<sup>8</sup> Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yäl̄rnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä.

<sup>9</sup> Suhuiitu xho gunä rebejn̄ ni yu' lo guidobäz xten beñdxab. Rniisireni najcreni xpejn̄ Israel, luxh direni gac; rusgueerene bejn̄. Narä sunäpac jiädzuxhijbreni nez lojtu, sunäza gacbeepacreni sanälazduxhä la'tu.

<sup>10</sup> Sa'csi basoobtu xtidxä ni gunibeä sutijptu, na'c jieedtu, ni'cni narä sacnäázatu che guidzujñ dxej tedtu trabajw. Luxh or̄ga ameer guidzujñ lo guideb guedxliuj, luxh sidejd guiraa reben̄ guedxliuj trabajw, te guibee reben̄sa'c lo reben̄ guedxliuj.

<sup>11</sup> Narä di gaclaa jiälä; gopdzu'tz ni rajptu, te rut gudzucajdi ni gunidxä xca'tu.

<sup>12</sup> Nani gun gaan lo dojl̄, narä gunäni si'c te pilajr nen̄ xquidoo Xtioozä, nalajznu, sajcni te bejn̄ nani gac guinibee cadro yu' Dios. Sibajñni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusalencoob, nani guirii xhaguibaa cadro yu' Dios; lojni sucuaäza laä ni najza nacoob sa'csi najcni xpeñä.

<sup>13</sup> Nani rrlajz cuadiajg diidx, sucuadiajgni ni rni Sprit Dxan xten Dios loj reguidoo.”

*Rediidx nani rniini lo rexpejn̄ guidoo ni yu' Laodicea*

<sup>14</sup> Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree:

15 Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ;Maläii guntu tejni o steeni!

16 Ni'cni, sa'csi najctu si'c nistiib, ditu gac si'c nisnajt, niclaza gactu si'c nislää, sibäro'ä la'tu.

17 Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rapjdilu, alga najclu ben gubijn, te ben probduxhlu, di lojlu jien, luxh suga'lu xhabäälü nez lo Dios.

18 Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäälü; gusiiza unguent loä te chää balojlu, te jien lojlu.

19 Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu.

20 Colhunii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnääni, te guiban<sub>sa</sub>'czani nez loä.

21 Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa.

22 Nani rlajz cuadiajg diidx, sucuadiajgni diidx ni rnii Sprit D<sub>xan</sub> xten Dios loj reguidoo.”

## 4

*Calä'preni xpala'n Dios xhaguibaa*

<sup>1</sup> Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxej cru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

<sup>2</sup> Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni.

<sup>3</sup> Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejt te xquitgubijdx ni rbebalsejs si'c guisa'c ni laa esmeralda.

<sup>4</sup> Guideb gabi cadro rnibeeni suga' galbitajp yagxhil, loj reyagxhilga sobga' galbitajp rebengool, najcwreni ladnoł, yu' coron oor yejc tejpgareni.

<sup>5</sup> Nez lo yagxhilro cadro rnibeeni rii reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dxan xten Dios.

<sup>6</sup> Nez loj cadro rnibeeni yu' astoocanu te nisdoo ni rien si'c te guiuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzreni yu' balojni.

<sup>7</sup> Manganidga najc si'c te lion; man ni rojppa najc si'c te gonbäz; man ni riojnga rujn lojni si'c rujn loj te niguii; man ni rdajppa najcni si'c te bisiro cagutajt xhaguibaa.

<sup>8</sup> Niluxh guidap remanga tejgareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yälrnibeduxh,  
nani yu' galooli, nani yu' naj, nani churu jiääd.

<sup>9</sup> Guidap remanga rliä'preni xpala'n Dios, rusuxhijbreni rajnrenini, rdeedzareni xquixtios loj nani rnibee par tejpas.

<sup>10</sup> Dxejc guigalbitap rebengool, suzuxhijbzareni loj nani rbej lo yagxhilo, te ganreni nani nabajn par tejpas. Sucuaareni xcoronreni nez loj xyagxhiloni, siniireni lojni, säjpreni:

<sup>11</sup> Dad Dios baxhuaannu, Guejbpac lu riäj l xca' guiraa rebala'n, guiraa reyälruzuxhijb, guiraa reyälrnibee,  
sa'csi Guejblu guläxtiej guira'ti nani yu' naj,  
yu'reni sa'csi rlajz Guejblu chureni,  
ni'cni benchee Guejblu guiraareni.

## 5

### *Te guijtz näj te ni najc Xiil xten Dios*

<sup>1</sup> Dxejcru narä Juan bahuiä lo nani sobga' lo yagxhilogä. Naani ladbee ca'ni te libr, najcni si'c te bilu guijtz. Caj diidx nez lojni caj diidx nez dejtzni, nadxe'ni, caj gajdz seii lojni.

<sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj l guxhal guijtzre? ¿Chuni'c riäj l gutiäjs reseiiire?

<sup>3</sup> Niluxh nicla tej bejn di nidxäj l ni riäj l gutiäjs reseiiga te guxhalni guijtzga; nicla xhaguibaa, nicla

lo guedxliujre, nicla xhajiät nez nen guedxliuj. Niclaza nidxäjł chu niajc nuhuiu lo guijtzga.

<sup>4</sup> Narä ronduxhä sa'csi nicla tej rut riäjłdi gutiäjs reseiiga, niclaza ni riäjł gol guijtzga, niclaza ni riäjł fiitis lo guijtzga.

<sup>5</sup> Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejnni gaan lo yälgujt ni'c naj riäjł guxhalni guijtzga, gutiäjszani guigajdz reseiiga.

<sup>6</sup> Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj.

<sup>7</sup> Laani gubigni, cua'ni guijtzga, guläänini naa ladbee xten nani sobga' lo yagxhilroga canibee.

<sup>8</sup> Che cua'ni guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejn Dios.

<sup>9</sup> Cayolzareni te dicoob ni najc scree:

Guejblu sacduxh,  
riäjłpac xca' Guejblu guijtzga,  
gutiäjs Guejblu reseiiga, sa'csi bagu't rebejnlu,  
näjza xtiejnlu gudijx xcuent bejn lo Dios.  
Gudijxlu xcuent bejn ni najc garen-garen raz,  
ni rnii garen-garen didxsaj,  
ni siääd garen-garen guejdx lo garen-garen  
ladxbejn.

10 Badeedlu gacreni reii näjza bixhojz lo Dios. Laareni sinibeereni reben guedxliuj.

11 Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najczeni, xhidalduxh miyon najczeni.

12 Dipduxh najc xse'reni, caniireni scree:  
Sacduxh Xiil nani bagu'treni,  
ni'c riäjł xca'ni yälrnibeduxh, yälrapduxh,  
yälmanduxh, yälmilagwr.

Riäjłza guiliä'pnu xpala'nni, guzuxhijbnu lojni gañnuni, gudeednu xquixtios lojni.

13 Dxejcti biejn diagä xse' guiragajczeni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xha-jiät nez neñ guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni, näjza loj ni najc Xiil xten Dios, laatisni sacduxhni, guiliä'pnu xpala'nni, guzuxhijbnu nez lojni gañnuni,  
gäbzanu rinibeeni par tejpas.

14 Dxejcti guidap remanga rnigajczeni scree:  
—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojñrenini.

## 6

### *Guigajdz reseii*

1 Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap

remanga, luxh che guniini riejn xse'ni si'c che ni canii guzii, najni loä:

—Gudaa te filu.

<sup>2</sup> Dxejc bahuiä lo te cabai nol. Nani bijb dejtzni ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

<sup>4</sup> Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälndoo, yälrbexilajz, lo guedxliujre, te ju't sa' rebejn. Badeedreni te spadro cua'ni.

<sup>5</sup> Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans.

<sup>6</sup> Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; chon kil salbaad xca'lu gunlu dzuun tebdxej. Niluxh na'c guhuallu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

<sup>8</sup> Dxejc bahuiä lo te cabai gojtz. Nani bijbni laa yälgujt, luxh dejtzni siädnaalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejnnga con spaad, näj yälrliaan, näj yälracxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios.

<sup>10</sup> Dipduxh caniireni, canabreni lo Dios, räjpreni:

—Dad, ni najc Dxiän, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

<sup>11</sup> Dxejcti cua'reni te ladnolbäj gojt tejgareni. Dxejc räjpreni lojreni cuäzsijceni, gusilajzreni, laj ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn.

<sup>13</sup> Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga.

<sup>14</sup> Dxejcti gunitloj guibaa si'cni rnitloj te guijtz che re'ni, rajcni te biliu. Guiraa redajn näjza reyuj ni re' galäii lo nisdoo biniibreni, bidxaa xladreni.

<sup>15</sup> Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajceni baxunreni, huicuatxlojreni nen rebiliää nen redajn.

<sup>16</sup> Dxejc räjpreni loj redajn, loj regulaj:

—Colguitejb yejcnu, colgucua'tz nuure loj nani rbej lo yagxhilro xhaguibaa näjza loj yälguxhtis xten nani najc Xiil xten Dios.



17 Sa'csi abidzujn dxero xten xcäl\_guxhtisni, ¿chuni'c sajc suu nez lojni?

## 7

### *Tegayuu tiubitajp miḷ rexpejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg.

<sup>2</sup> Bahuiä lo stee xangl Dios, ni siääd nez cadro rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo.

<sup>3</sup> Räjpnj lojreni:

—Guläzsijctero, laḷ ni guicuaanu te seen lo cuaj reni najc xpejn Dios, te dxejcru sajc guntu daan lo yuj, näj loj nisdoo, näj loj reyajg.

<sup>4</sup> Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp miḷ bejn ni bibee loj rexpejn Israel.

<sup>5</sup> Loj rexpejn Judá bibee tzubitio'p miḷ; loj rexpejn Rubén bibee tzubitio'p miḷ; loj rexpejn Gad bibee tzubitio'p miḷ;

<sup>6</sup> loj rexpejn Aser bibee tzubitio'p miḷ; loj rexpejn Neftalí bibee tzubitio'p miḷ; loj rexpejn Manasés bibee tzubitio'p miḷ;

<sup>7</sup> loj rexpejn Simeón bibee tzubitio'p miḷ; loj rexpejn Leví bibee tzubitio'p miḷ; loj rexpejn Isacar bibee tzubitio'p miḷ;

<sup>8</sup> loj rexpejn Zabulon bibee tzubitio'p mil; loj rexpejn José bibee tzubitio'p mil; loj rexpejn Benjamín bibee tzubitio'p mil.

*Benquixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn, benquixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zaren i zijn.

<sup>10</sup> Dipduxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

<sup>11</sup> Suga'za guiraa rexangl Dios guideb gabi yagxhilo cadro rnibeeni, näjza guideb gabi rebenqool näjza guidap remanga, dxejcti bazuxhibreni, basajbreni lojreni nez lo Dios,

<sup>12</sup> räjpreni:

Sugacni si'c. Loj Xtioistisnu colye'tz sacduxhni; colguiliä'p xpala'nni; laatisni rajpni yäl'najn; lojtisni colgudeed xquixhtios, laatisni colgan, colsuxhijb lojni; laatisni rajpni yälrnibee näjza yälmilagwr.

Sugacni si'c par tejpas.

<sup>13</sup> Dxejc gunii te benqool loä, najni:

—Renani najcw reladnolbäjre, ¿chu najcreni? ¿Casiäädreni?

<sup>14</sup> Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwduxh, renani abia rextojlreni sa'csi xtiejn Xiil xten Dios agudijx xtojlreni.

<sup>15</sup> Ni'cni suga'reni nez loj yagxhilro xten Dios dxej-yääl cayujnreni xtzuunni neñ xquidooni. Ni'cni sacnäj nani sobga' lo yagxhilroga guiraa renani suga' nez lojni, sunäjtisni laareni.

<sup>16</sup> Dirureni guiliaan, niclaza jiojlreni, diza gubijdx guze'c lojreni, dizareni gacnanlaa.

<sup>17</sup> Sa'csi nani najc Xiil xten Dios ni sobga' galäii loj yagxhilro xten Dios, laani cayajpnireni si'c xilbäz, sinänireni cadre yu' nisyä ni rudeed yälñabajn par tejpas. Suspijdz Dios nisbee balojreni, dirureni goon par tejpas.

## 8

### *Ni rajc gajdz seiiga*

<sup>1</sup> Che batiäjsni ni rajc gajdz seiiga, gucdxi xh-guibaä si'cti med or.

<sup>2</sup> Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't.

<sup>3</sup> Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga.

<sup>4</sup> Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios.

<sup>5</sup> Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo

guedxliuj. Dxejc guyu' te guziduxh, bidinyaduxh, gujca te xuduxh.

### *Retrompe't*

<sup>6</sup> Dxejcti guigajdz rexangl Dios ni ca' guigajdz retrompe't, guzusiñreni te guisloj golreni retrompe'tga.

<sup>7</sup> Che bil trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejca ni riojn la' reyajg näjza guiralii recuaan.

<sup>8</sup> Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn.

<sup>9</sup> Dxejcti gujt ni riojn la' rebäjł näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

<sup>10</sup> Che bil ni riojn xangl Dios trompe't ni ca'ni, biajb te balro xhaguibaa, cayejcnı si'c te balguejd. Bitejbni loj ni riojn la' regueuu, näjza cadre rliejn nis.

<sup>11</sup> Laj bajlga najc Ajenjo, ni säloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisnanaaga.

<sup>12</sup> Che bil ni rdajp xangl Dios trompe't ni ca'ni, guxhijn ni riojn la' gubijdx, näjza ni riojn la' bäii, näjza ni riojn la' rebal xhaguibaa, bicäjyreni. Dxejcti dirureni guzanij ni riojn la' dxej, näj ni riojn la' yääl.

<sup>13</sup> Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben<sub>u</sub> guedxliuj che guisloj gol<sub>u</sub> schon<sub>u</sub> rexangl Dios retrompe't ni ca'reni. Sidejd reben<sub>u</sub> guedxliuj trabajwduxhru.

## 9

<sup>1</sup> Che bil<sub>u</sub> ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl.

<sup>2</sup> Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej.

<sup>3</sup> Dxejcti lo gujxhga birii betzsu gusujreni guideb lo guedxliuj. Cua'reni yäl<sub>u</sub>rnibee gacreni nialajz si'c nialajz renaxejb.

<sup>4</sup> Cua' remanga yäl<sub>u</sub>rnibee na'c gunreni daan loj reguixa', loj recuaan, loj reyagbaj<sub>u</sub>; rebejt<sub>u</sub>ntis nani xhet beedi xten Dios caj lo cuajreni, reni'c gusacsíreni.

<sup>5</sup> Cua'reni yäl<sub>u</sub>rnibee na'c ju'tni bejn<sub>u</sub>, gaii bäii gusacsíreni xcäl<sub>u</sub>nayanreni bejn<sub>u</sub>. Luxh xcäl<sub>u</sub>nayanreni najc si'c yäl<sub>u</sub>nayan cadro rauya' te naxejb te bejn<sub>u</sub>.

<sup>6</sup> Nen<sub>u</sub> redxejga, siguiil rebejn<sub>u</sub> yäl<sub>u</sub>gujt, luxh direni guidxäl<sub>u</sub>ni. Luxh mase rlajzreni guetreni, sibicaj yäl<sub>u</sub>gujt lojreni.

<sup>7</sup> Rebetsure najc si'c recabaii ni suchee te chääreni lo guer<sub>u</sub>. Yejc<sub>u</sub>reni yu' te ni najc si'c te coron<sub>u</sub> oor; luxh lojreni rujn si'c loj rebejn<sub>u</sub>.

<sup>8</sup> Xquichej<sub>u</sub>reni si'c najc xquichejc gunaa; reläyj<sub>u</sub>reni najc si'c läjy lion<sub>u</sub>.

<sup>9</sup> Luxh guideb tiejxh<sub>u</sub>reni caj si'c guuib ni rusäudzu'tzreni. Rubeduxh rexhigaareni, si'c rubej che ruxun<sub>u</sub> xhidalduxh cabaii näj xca<sub>u</sub>reni che agojl chääreni guer<sub>u</sub>.

10 Xhibaanreni najc si'c xhibaan naxejb, xcuchreni yu' yälñayan te gusacsíreni reben̄ guedxliuj gaii bäii.

11 Yu'za ni rnibee lojreni, xangl beñdxab ni birii gabijl. Xtidx hebreo laani Abadón, xtidx griegw, laani Apolión.

12 Naj agudejd tej casionroga, ñaj cayäädx stio'pni.

13 Che bil̄ ni rxho'p xangl Dios trompe't, biejn diagä te xse' bejn̄ ni lascanu siäädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios.

14 Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

15 Dxejcti baslaani guidap reanglga te ju'treni ni riojn̄ la' beñ̄ guedxliuj. Luxh gule Dios reanglga parpac dxejga, bäiiga, ijzga.

16 Biejn diagä bal najc guiraa resoldaad ni rbijb cabaii: najcreni tio'p gayuu miyon̄.

17 Scree bahuiä lo bacal̄ recabaiiga näjza renani bijb recabaiiga. Lastoo reni bijb recabaii caj te guiib, najcni xniaa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr.

18 Ni riojn̄ cuaa bejn̄ gujt xcuent guichon̄ replaag nani carii ro' recabaii, xcuent bajl näj gujxh, näjza sufr.

19 Recabaii runnäjä daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjäreni daan.

<sup>20</sup> Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebendxab, najza rebanäjb ni nac-chee oor, najza pla't, najza latón, najza guiij, najza yajg. Luxh rebanäjbga di gacdi fiireni, di diajgreni jiejn, di gacdi sareni.

<sup>21</sup> Diza rebejnga nusiejch lajzreni xcuent xcälrugutreni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaanreni.

## 10

### *Te angl ni ca' te guiitz*

<sup>1</sup> Bahuiä stee xangl Dios ni rajp yälribeduxh, siädjiäjtni xhaguibaa, li yu'ni nen bäj, yejcnì dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl.

<sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj,

<sup>3</sup> dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa.

<sup>4</sup> Che gulujx gunii guziiga, narä rlazä nucuaä lo guiitz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo najza loj yuj, guläs naani ladbee nez xhaguibaa.

<sup>6</sup> Guniliini diidx con laj GuebDios ni nabajn par tejpas, ni guläxtiej xhaguibaa najza guiraa ni tre' xhaguibaa; ni guläxtiej guedxliujre najza guiraa ni tre' lojni; ni guläxtiej nisdoo najza guiraa ni tre' nen nisdoo. Räjzni:

—Diru redxejre gaclaa.

<sup>7</sup> Che guidzujntis dxej ni agojl goḷ ni najc rga-jdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladzḡaa angl ni suj te laad ni'ni loj nisdoo, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanḷaani xque'lu, niluxh ro'lu sajcnj nejxh si'c dzujn.

<sup>10</sup> Dxejcti cua'ä libre'ga lo ḡaa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanḷaani xque'ä.

<sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rereii.

## 11

### *Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb neḡga.

<sup>2</sup> Na'c gutiexhlu gabi lole' guidooga, sa'csi ni'c acua' rebenzijtḡni te tiubitio'p bäii chaläjsreni guedxdxan si'ctis ni rlajzreni.



<sup>3</sup> Narä sudedä yäl̄rnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mil̄ tio'pgayuu gayojn̄ dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios.

<sup>5</sup> Palga yu' chu bejn̄ rlajz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäj̄l guet chutis ni rlajz gun latsiajreni.

<sup>6</sup> Guiro'p redade'ga rajp yäl̄rnibee te gusäureni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yäl̄rnibee te guchaareni nis te gacni rejn, rajpzareni yäl̄rnibee te jiädgusacsí xhitis plaag lo guedxliuj, si'ctis huält ni rlajzreni.

<sup>7</sup> Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijl̄ni guiro'preni. Sujnni gaanreni, sugu'tnireni.

<sup>8</sup> Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruzj. Guejdxroga rbälajzareni Sodoma näjza Egipto.

<sup>9</sup> Choñ dxej garol guiraa rebejn̄ ni siädäd guedxbäz, ni siädäd guedxro, ni najc garen-garen řaz, ni rnii garen-garen xtidx guiraa rebejn̄ guedxliuj, suhuui loj guiro'p rebengutga, direni gusaan guiga'tzreni neñ baa.

<sup>10</sup> Guiraa renani nabajn̄ lo guedxliujre sibal-azduxhrene sa'csi gujtreni. Luxh sa'csi rbala-jzduxhrene, suxhałzareni xhi xca' sa'reni; sa'csi guiro'p redade' ni basule' xtidx Dios baxhał traba-jwduxh lojreni.

11 Che gudejd chon dxej garolga, baspañsac Dios-reni, dxejcti huitiesacreni. Guiraa reni bahuii lojreni, bidxebduxhreni.

12 Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa.

13 Lagajc orga gujc te xuduxh, gurebä'n tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhreni, guslojreni calä'preni xpala'n Dios ni yu' xhaguibaa.

14 Si'cti gulujx ni rojp casioon, luxh agojl guidzujñ ni riojnga.

### *Ni rajc gajdz xangl Dios gol trompe't*

15 Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladzñaa Dad Dios näjza Jesucrist;

luxh laani sinibeeni par tejpas.

16 Galbitajp rebengool nani sobga' lo tron xtenreni cadre rnibee Dios, biabrlojreni nez loj Dios te calä'preni xpala'n Dios.

17 Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

18 Bidxe'ch reben guedxliuj lojlu, luxh abidzujñ dxej guidxe'chlu lojreni,

gunlu yäl\_guxhtis reben\_gut, te gudeedlu cossa'c loj  
 rexpejn\_lu,  
 lo renani gunii xtidx Dios, lo renani huililajz xti-  
 idxlu, lo renani rusuxhibni nez lojlu;  
 reben\_proob sigajc reben\_ro.  
 Abidzujn\_za dxej che cuäcajlu renani bejn daan  
 guedxliujre,  
 te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa,  
 neñ guidooga bien te guiñ cadro yu' guiñ cadro  
 caj rediidx ni bia'n Dios loj rexpejn Israel. Dxejcti  
 lacti bidinya', lacti guiniiza reguziro, gujc te xu,  
 dxejc biajb te guixobroduxh.

## 12

### *Te gunaa näj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa  
 ni najcw si'c gubijdx, ni'ni sojb bäii, yejcnii yu' te  
 coron\_ ni nac-chee tzubitio'p balxhaguibaa.

<sup>2</sup> Gunaare nuxi'nni. Rbedxa'ni sa'csi agusloj  
 cayu' yoob xque'ni te gaal xi'nni, cadejdni traba-  
 jwduxh.

<sup>3</sup> Dxejcti bahuiä stee seen xhaguibaa: te manx-  
 niaa ni rujn lojni si'c loj te gutiatzro, manduxhni.  
 Yu' gajdz bitiu yejcnii, sojb tzuu xca'chni. Tejga  
 yejcnii yu' te coron\_, najcreni gajdz coron\_.

<sup>4</sup> Dxejcti xhibaanni cagobxajxhni ni riojn la' re-  
 balxhaguibaa, dxejcti bacuaanireni lo guedxliuj.  
 Dxejcti biädsu manroga nez loj gunaaga ni ameer  
 gaal xi'nni, te gauni xi'nni che gaalni.

<sup>5</sup> Dxejcti gojl xi'n gunaaga, najcnii te niguii, luxh  
 te bar guuib nungäj\_l guinibenäj\_ni lo guiraa reben\_

guedxliuj. Guläsgajcreni bázga te sanärenini xhaguibaa cadro rnibee Dios.

<sup>6</sup> Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

<sup>7</sup> Dxejc guyu' guer xhaguibaa, xangl Dios nani laa Miguejl náj resa'ni bacuanäjreni gutiatzro. Gutiatzroga nájza rexanglni gudilduxhreni,

<sup>8</sup> niluxh direni niujn gaan, luxh di niajcdiru nia'n manga nájza resa'ni xhaguibaa.

<sup>9</sup> Dxejcti bacuaareni manroga nájza resa'ni lo guedxliujre. Laani najc ni gujc bäl galoroga, ni najc gueb Beñdxab, ni laaza Satanás, ni rusguee guideb guedxliujre.

<sup>10</sup> Dxejcti biejn diagä xse' te ni canii dipduxh xhaguibaali, räjpni:

—Abidzujn yälruslaa lo dojl, náj yälmilagwr, náj yälrnibero xten Dios, nájza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

<sup>11</sup> Laareni gujc bejnreni gaan loj beñdxabre, xcuent xtiejn ni najc Xiil xten Dios, nájza sa'csi huililazsa'creni xtidx Dios, dizareni nidxejb mase niejtzareni.

<sup>12</sup> Ni'cni, guiraa la'tu ni yu' xhaguibaa nájza gueb xhaguibaa, colquibalazduxh. Niluxh riaduxhnu renani rbäjz lo guedxliujre, nájza lo nisdoo, sa'csi abiäjt beñdxab lo guedxliuj, luxh cadxechduxhni sa'csi anajnni guxii dxej räjpni.

<sup>13</sup> Che guchee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsínini.

14 Dxejc badeed Dios lo gunaaga tio'p xhiga xten bisiro, te gac gutajtñi nez lo reyubijdz cadre nachee cadre cuääzñi. Choñ ijz garol guyu'ni ro'c, nacuatzlojni lo bälga.

15 Dxejcti ro' gutiatzrore birii nis si'c te gueuu te nuslo'ni gunaaga.

16 Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga.

17 Dxejc bidxechduxh gutiatzroga loj gunaaga, ni'c sääni te gucuanäjñi sgaii rexì'n gunaaga, renani cagusoob diidx ni gunibee Dios, renani rililajza xtidx Jesucrist.

## 13

### *Tio'p manduxh*

1 Narä gusuä lo yujxh ni tre' ro' nisdoo, dx-  
ejc bahuiä carii te manro lo nisdoo. Sojb tzuu  
xca'chni. Dxejc lo tejga xca'chni yu' te coron. Yu'  
gajdz bitiuyejñi cadre caj diidx ni rniyaj Dios.

2 Manduxhre najc si'c te beedz, ni'ni najc si'c ni'  
te os, luxh ro'ni najc si'c ro' te bedzro. Gutiatzroga  
badeed xcälmlaagwrni lojni, näjza tron cadre rbe-  
jni, näjza xcälrnibeduxhni.

3 Dxejcti bahuiä te yejñi najc ascanu yu' chu  
batiuugni con madxed, ameer guetni, luxh biajc  
cadre gurujg yejñi. Ni'cni rdxeloduxh guiralii  
rebejn guedxliuj, sanajlreni manduxhga.

4 Bazuxhijbreni gojnreni gutiatzroga sa'csi  
badeedni xcälrnibeeni lo manduxhga, dxejctiru  
bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijl̄ni, gucuanäj̄nini?

<sup>5</sup> Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yäl̄rnibee tiubitio'p bäii, gunni si'ctis ni rlanj̄ni.

<sup>6</sup> Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa.

<sup>7</sup> Dxejcti yu' chu basaan bacuanäj̄ manroga rexpejn̄ Dios. Bejn manroga gaan rexpejn̄ Dios, dxejcti gunibee manroga guiraa reguedxbäz, näj guiraa rebejn̄ ni rnii garen-garen xtiidxreni, näjza guiraa reguedxroduxh.

<sup>8</sup> Dxejcti guiraa reben̄ guedxliuj sazuxhijbreni, sagaj̄nreni manroga, guiraa rebejn̄ nani di lajreni nicaj lo libr xten yäl̄nabajn̄ xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpejn̄ Dios.

<sup>9</sup> Palga yu' chu rlanjz cuadiajgni, sugucuadiagsa'cni.

<sup>10</sup> Palga yu' chu nungäj̄l̄ jiäuu nen̄ latzguiib, siäuuupacni. Chutis ni ju't te bejn̄ con te madxed, con madxedza guetni. Ni'cni renani anumbee Dios, riäj̄l̄ gunreni huant, chanuutis chalilazsa'creni xtidx Dios.

<sup>11</sup> Dxejcti bahuiä loj stee manro, cariini nen̄ yuj. Sojb tio'p xca'chni si'c xca'ch te xiil, rnii si'c rnii te gutiatz.

<sup>12</sup> Luxh rnibeezani si'cni rnibee manroga la-gajc nez loj manroga, rujnzani rusuxhijb reben̄ guedxliuj loj manrogalooga ni guruyc yej̄cni, luxh biajc yej̄cni.

13 Manroga ni birii nen yuj rujnzani remilagwrrro, rujnni rtejb bal-guiboo xhaguibaali, rtejbni lo guedxliuj nez loj rebejn.

14 Rusgueeni rebejn nani nabajn lo guedxliuj xcuent remilagwrrro nani rujnni nez loj manroga-looga. Guinibeeni gun reben guedxliuj te banäjb si'c najc manroga nani batiuug madxed yejcnì, luxh bñajcza yejcnì.

15 Dxejcti man ni rojppa baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini.

16 Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc beñro, guiraa reni najcza beñbäz.

17 Gunibeezani digacdi sii, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga.

18 Dee rquiin yälñajn. Renani rajp yälñajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

## 14

### *Dij ni rol te gayuu tiubitajp mil*

1 Che bahuiä stee, bahuiä suga' Xiil xten Dios yejc dajn ni laa Siön. Sugañjni te gayuu tiubitajp mil bejn nani caj lo cuajreni laj Xiil näj laj Xtadni.

2 Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni rol arp.

<sup>3</sup> Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp miḷ bejn nani guḷaa lo reben guedxliuj.

<sup>4</sup> Reniguiire najc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis sääni. Redee guḷaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch.

<sup>5</sup> Nicla tej didx-xhii di guirii ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

### *Rediidx nani bazule' jion rexangl Dios*

<sup>6</sup> Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rnii garen-garen xtii-dreni.

<sup>7</sup> Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiajni, xcuent dojl ni bejni guideb lagaa; najcni si'c reni rä' nejp.



9 Dxejc biädnaĵl ni riojñ xangl Dios, dipduxh guniini, Räjpnĵ:

—Palga yu' chu bejñ guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani,

10 sidxechduxh Dios lojni, di xcälġuxhtisduxh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiil xten Dios.

11 Luxh gujxh xten reni cayejc sä'p nez lojreni guixe-guixee par teppas. Digacdi gusilajzreni dxej-yääl, renani guzuxhijb, reni gojñ manroga näjza reni gojñ banäjb ni najc si'c manroga, chutisza ni rca' seen xten lajni.

12 Ni'cni renani huililajz xtidx Dios, reni ru-soobza xtidx Dios, ni rinuutis lo xnezyuj Jesucrist, nanab di guidxajgreni.

13 Biejñ diagä xse' te ni caniini loä xhaguibaali:

—Scree bacuaa: “Chicbaa rebejñ ni guet ñajli nani rililajz xtidx Jesucrist.” “Guliini”, naj Sprit Dxañ xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

### *Yälñasa'c ni rudeed guedxliujre*

14 Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcnĵ, dxejcti ñaani ca'ni te guiboz ni caduxh ro'ni.

15 Dxejcti birii te xangl Dios loj xquidoo Dios, dipduxh caniini loj ni sobga' loj bājga, räjpnĵ:

—Basäl xquibozlu, batiuug, te batie' yälñasa'c, sa'csi agojñ or guire' yälñasa'c, guideb guedxliuj aguyajñni.

16 Dxejcti nani sobga' lo bājga basniibni xqui-bozni, batiuugni yäl<sub>h</sub>nasa'c ni caj lo guedxliujre.

17 Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni.

18 Dxejcti birii stee xangl Dios nez loj piändxan xten Dios. Laani rajpni yäl<sub>h</sub>rnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl<sub>h</sub> xquiobozlu nez ni' reyaguub, batiuug guiraa reresim<sub>h</sub> uub ni yu' lo guedxliujre, sa'csi aguyajlreni.

19 Dxejc batiuug anglga guiraa reresim<sub>h</sub> uub ni yu' lo guedxliujre nalajznu rebenguijdx, basäl<sub>h</sub>nireni neñ tanc cadre guläjreni yejcti sa'csi rdxechduxh Dios lojreni.

20 Dxejcti baläjreni yejc reuub nez orii te guejdx. Biriiduxh rejn yejcteni, gutiäs rejnga, bidzujñ re-jnga ro'li recabaii, gujcti si'c che riu' nisro gueuu, biäjtni si'cti choñ gayuu mil metr guideb gabi cadre baläjreni yejc reuub.

## 15

### *Guigajdz xangl Dios näj lult xcäl<sub>h</sub>guxhtis Dios*

1 Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, teygareni ca' te plaag ni gusacsí reben<sub>h</sub> guedxliuj. Redeetis najc lult, sa'csi che ted redee ati agulujx yäl<sub>h</sub>rdxe'ch xten Dios.

2 Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nisdooğa suga' renani bejn gaan loj manroga näjza lo banäjb

ni najc si'c manroga, ni bejnza gaan di nica'reni seen xten lajni. Ca'reni arp xten Dios.

<sup>3</sup> Cayol'reni dij xten toMoisés ni gujc xpejn Dios, cayolzareni dij xten Xiil xten Dios. Scree najc dijga: Sacduxh, ruscheloj guiraa redzuun ni rujn Guejblu, Dad Dios, ni rajp guiraa yälrnibee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

<sup>4</sup> Bahuii, Dad, ¿chu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloj guiraa rextzunsa'cpac Guejblu.

<sup>5</sup> Dxejcti bahuiä xhaguibaa, bixal ro' yu' ni najc dxanro neñ guidoo, cadre yuchee guij cadre caj xleii toMoisés.

<sup>6</sup> Ro' yudxanroga birii gajdz xangl Dios ni ca' plaag te gusacsíreni reben guedxliuj. Najcwreni te ladliñ ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor.

<sup>7</sup> Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälğuxhtisro Dios nani nabajñ par tejpas.

<sup>8</sup> Gudxaj guidoo ni najc yudxanroruga gujxh ni siädä xcuent xcälmlaagwr, xcälrdimbichaduxh xten Dios. Rut gujcdi biu' neñ yudxanroruga che gulu-jxli guiraa replaag ni ca' guigajdz reanglga.

# 16

## *Rexhijg ni guidxa xcälguxhtis Dios*

<sup>1</sup> Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

<sup>2</sup> Anglgaloo ni huij, baslojni ni yu' nen xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajnreni banäjb ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejc ni rojp anglga baslojni ni yu' nen xhijg ni ca'ni loj nisdoo, te bejnni gubixhloj nisdooa gujcnii si'c rejn xten te beņgut. Dxejcti gujt guiralii reman ni yu' lo nisdoo.

<sup>4</sup> Ni riojn anglga baslojni ni yu' nen xhijg ni ca'ni loj regueuu näjza cadre rliejn nis. Gubixhlojreni gujcreni rejn.

<sup>5</sup> Dxejcti biejn diagä gunii angl ni rajp yälrnibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yälguxhtis redzunguijdx.

<sup>6</sup> Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjł gacreni.

<sup>7</sup> Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrnibee, xcälguxhtis Guejblu najc laaca, si'c riäjł gacni.

8 Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yälrnibee guze'cnäjni rebejn guiboo.

9 Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechlajzreni, niclaza niliä'preni xpala'n Dios.

10 Dxejcti ni rajc rgaii anglga cua' xhijg ni ca'ni baslojni ni yu' nen xhijgga lo tron cadro rnibee manroduxh. Bicäy guideb cadro rnibee manduxhga, luxh rebejn rauya'tisreni lujdxreni sa'csi cayajcreni yälñayanduxh.

11 Guniyajreni Guejb Dios ni yu' xhaguibaa sa'csi rajcreni yälñayanduxh, xcuentza rexquedx-nayanreni. Luxh direni nusiechlajzreni xcuent xtojreni.

12 Dxejcti ni rajc xho'p anglga cua'ni xhijgni, baslojni ni yu' nen xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jääd nez cadro rliejn gubijdx.

13 Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon spritguijdx ni najc si'c bedz,

14 sa'csi najcreni resprit xten beñdxab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp giralii yälrnibee che guidzujñni lo guedxliuj.

15 “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa

xhajbni, te na'c guiga'ni xhabäälni, jianxtujyni che guibi'ä.”

<sup>16</sup> Dxejc gutie'reni guiraa rebejnre te lajt ni laa lo didx hebre “Armagedón”.

<sup>17</sup> Dxejcti ni najc rgajdz anglga cua'ni xhijgni baslojni ni yu'neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

<sup>18</sup> Dxejc guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac.

<sup>19</sup> Che gujc xuroga, biräjs guedxroduxhga, gujcnj choñ la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga.

<sup>20</sup> Li gubicaj, gunitloj reyuj ni tre' lo nisdoo, gunitlojza redajn.

<sup>21</sup> Xhaguibaali biajb te guixhobro yejc rebejn; tejsa guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnj.

## 17

### *Gun Dios yälguxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis.

<sup>2</sup> Guiraa rereii lo guedxliujre bennäjreni gunaaga dojl, sigajcza guiraa reben guedxliuj

bennäjreni gunaaga dojl. Gusosnäjreni gunaaga bejnreni si'ctis ni rlajzreni.

<sup>3</sup> Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuycjni, sojbza tzuu xca'chni.

<sup>4</sup> Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj.

<sup>5</sup> Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.”

<sup>6</sup> Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä.

<sup>7</sup> Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuycjni näj tzuu xca'chni.

<sup>8</sup> Manroga ni bahuiilu gubajñni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guiitz xten yälñabajñ xten Dios, guiitz ni guc-chee che birixtiejli guedxliuj, rebejnnga sidxeloduxhreni che fiireni loj manroga nani gubajñ galoo, ni gunitloj, niluxh naj agubañsacni.

<sup>9</sup> 'Ree nanab ga'pni yälñajñ. Gajdz rebitiuycjni säloj gajdz dajn cadre sobga' gunaaga,

<sup>10</sup> sälojzareni gajdz rei. Agujc gaii reiiga ni cayajb. Tej rereiiga canibee naj. Stee reiiga churu jääd. Luxh che jääd lult reiiga, guxii dxej guinibeeni.

<sup>11</sup> Manro ni gubajn galoo, ni agunitloj naj, ni'c rac xhujn rei, najczani tej loj guigajdz rerei, luxh sinitlojni, sejtni par tejpas.

<sup>12</sup> 'Guidzuu rexca'chni ni bahuiilu säloj tzuu rei. Gajdreni guisloj guinibee naj. Laareni näjza manroga xca'reni yälrnibee teb or, nalajznu guxii dxej.

<sup>13</sup> Tejtis xhigab gun rereiiga, gudeedreni xcäl'nadipreni, xcäl'rnibeereni lo manroga.

<sup>14</sup> Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rerei. Luxh renani siäd'najlni najc reni agurejdxni, reni aguleni, sisiudzu'tznäjreneni.

<sup>15</sup> Dxejcti najza anglga loä:

—Reni ni bahuiilu cadre sobga' gunadxabga säloj guiraa guejdx, guiraa bejn guedxliuj, guiraa bejn ni rnii garen-garenca xtiidxreni, ni siäd garen-garen reguejdx.

<sup>16</sup> Guitzuu reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäalni, sawreni bältiejxhni, suze'creni gunadxabga lo guiboo.

<sup>17</sup> Sa'csi abasniib Diosreni te gunreni tejsi xhigab, te gudeedreni xcäl'rnibeereni lo manroga che guidzujnli dxej ni chale' guira'ti ni gunii Dios gac.

<sup>18</sup> Gunadxabga ni bahuiilu säloj guedxro ni rnibee loj guiraa rerei loj guedxliuj.



# 18

## *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni siädyäjt xhaguibaa. Siädnäni yäl̄rnibeduxh, xcäl̄rdimbicha'ni bazanij loj guedxliujre.

<sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäjz reben̄dxab, ro'c rcanzaj guiralii cuaa spritdxab, najczani xpi-tiäaz guiraa reman xhaguibaa ni najc mandxab, mandxuudx.

<sup>3</sup> Sa'csi guiraa reben̄ guedxliuj agusojzreni xcuent dojl̄ ni bennäjreni gunadxabga, guiraa rereii loj guedxliuj bejn̄ dojl̄ guläsnäjreni gunadxabga, luxh guiraa reben̄ guedxliuj ni ruto' abejnreni ganduxh, agujcreni ri'cw xcuent recosdxab ni rujn̄ gunabdxabga.

<sup>4</sup> Dxejcti biejn̄ diagä xse' stee nani canii xhaguibaa:

—Col̄guirii guejdxga rexpänä, te di näj la'tu gunnäjtu gunadxabga dojl̄, te di tedtu trabawduxh lo replaag xtenni.

<sup>5</sup> Sa'csi yuduxh rextojl̄ni, abidzujn̄reni xhaguibaali, luxh abanajza lajz Dios rextojl̄ni.

<sup>6</sup> Col̄gudeed loj gunaaga sigajc ni badeedni lojreni. Col̄quijx loj gunaaga tio'pli huält lo ni bejni laani. Nen̄ co'p cadre badeedni gu' bejn̄ (te trabajw ni bateedni bejn̄), lagajc nenga col̄yejn̄ te ni najc tio'p huält maazru fuert yä gunadxabga, nalajznu tedni trabajw tio'p huält.

<sup>7</sup> Lacti gulä'p gunaaga xpala'nni, gubajnni si'ctis ni rlanjni lo guedxliuj. Naj col̄guteed gunaaga

trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajñni, sigajcza gac-huin lastooni sa'csi bejnñi xhigab neñ lastooni: “Narä sobga'ä ree si'c te reiñ, te beñroduxh, dina gacä biuud, ni claza gac-huin lazä.”

<sup>8</sup> Ni'cni tejsi dxej siajb yejçni guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gun xcälgujhtisni.

<sup>9</sup> Guiraa rereii lo guedxliujre ni bennäj gu-naadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadre cayejçni.

<sup>10</sup> Zijtru sisiujçeni sa'csi rdxejbreni replaag xten gunadxabga, dxejc siniizarenì:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujñ yälgujhtis yejclu.

<sup>11</sup> Rebejñ ni ruto' loj guedxliuj sonduxhreni, siarenì guejdxga sa'csi rutru rsiidi xhixtenreni ni ruto'reni.

<sup>12</sup> Laarenì ruto'reni oor, pla't, guiraloj reguisa'c, perl, ladliñ, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm,

<sup>13</sup> näjza caneel, guiraloj laj comiid, näjza yalnejxh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejñ ni ruto'reni tiejxhreni, xaimreni. Guiraa reni'c ruto'reni.

<sup>14</sup> Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, son-duxhreni, sac-huinuxh lajzreni,

<sup>16</sup> säjbreni:

—Aii, aii, riaduxhnu guedxrore, naiti gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl,

<sup>17</sup> tera'tbäztis baralii recosro ni najc xhixtenni, guxhijnreni.

Guiraa recapitán xte barcw, näjza guiraa re-marineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt,

<sup>18</sup> näjza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

<sup>19</sup> Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuentis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

<sup>20</sup> Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejnni lojtu.

<sup>21</sup> Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni.

<sup>22</sup> Diru guibi' jiejn cayel nez xladcaiilu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't.

<sup>23</sup> Diru guibi' jien xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni benroduxh lo guedxliuj sa'csi basguezalu reben guedxliuj xcuent rextzundxablu.

<sup>24</sup> Neñ guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidalo bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälruslaa lo dojl,  
näj yälrdimbicha', näj yälmilagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadx-  
abga nani caguxhiñ reben guedxliuj xcuent  
xcälñadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe'  
gunadxabga, che bagu'tnireni.

<sup>3</sup> Guibi' guniizareni:

—¡Colguiliä'p xpala'n Dios! Gujxh xten gunadx-  
abga sanuutis cayä'p par tejpas.

<sup>4</sup> Guiraa regalbitajp rebengool näjza guidap remanbajnga bazuxhijbreni, biabrojreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

<sup>5</sup> Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,  
guira'tu ni rujn xtzuun Dios,  
guira'tu ni rajntu Dios, rebenro sigajc  
rebennadolajz.

*Sa' xten Xiil xten Dios*

<sup>6</sup> Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guirali  
yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujn dxej guchnaa Xiil xten Dios, aguzucheeza dxa'p.

<sup>8</sup> Abadeedreni ladlin ni najc nuiduxh gacwni. Ladnolni, luxh rdimbicha'ni sa'csi nayadujni. Ladnayare säloj redzunsac ni bejn rexpejn Dios.

<sup>9</sup> Najza anglga loä:

—Bacuaa diidre: “Chicbaa renani bidon jääd lo xsa' Xiil xten Dios.”

Guniizani loä, najni:

—Rediidre najc didx-guliipac xten Dios.

<sup>10</sup> Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu

ni rusule' xtidx Jesucrist. Bazuxhijb lo Diostis sa'csi Dios ruedeed gusule' bejn xcuent Jesucrist, gusule'zareni xtidx Dios.

*Nani bijb te cabainol*

<sup>11</sup> Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguli. Entis laaca rujnni yälguxhtis, entis laaca rucuaani che rujnni gueṛ.

<sup>12</sup> Rebalojni rbebajl, yejcti yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni.

<sup>13</sup> Najcwni te lajd ni nadiini rejn; lajni najcza Xtidx Dios.

<sup>14</sup> Guiraa resoldaad guibaa xten Dios siädnaajni najcwreni ladnol, ladnaya, bijbzareni cabainol.

<sup>15</sup> Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdxechlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee.

<sup>16</sup> Lo xhajbni näjza cuä' cujdni caj lajni: “Reii xten rereii, Dad xten redad.”

<sup>17</sup> Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Colṭaa, colguire' ree, te gautu xcheroduxh xten Dios;

<sup>18</sup> te gautu xpääl rereii, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi

bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbáz sigajc rebenro.

<sup>19</sup> Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenni.

<sup>20</sup> Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajnreni nen te bal guiboduxh ni recnäj sufr.

<sup>21</sup> Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälneni.

## 20

### *Te mil ijz*

<sup>1</sup> Dxejcti bahuiä loj te xangl Dios ni siädjiäjt xhaguibaa, siädnäni läii ni ruxhal guedro ni laa gabijl. Ca'zani te cadenro.

<sup>2</sup> Anglre gunaaz gutiatzroga, ni gujc bäl galooli, ni najcza ben<sub>u</sub>dxab, ni laaza Satanás. Bacuaduunini te mil ijz.

<sup>3</sup> Basäl<sub>u</sub>nini nen gabijl, te ro'c basäunini, bacuaani läii te na'cru gusgueeni reben guedxliuj la<sub>u</sub> ni guiza' te mil ijz. Che guiza' reijzga, empac sibi' lasacni bale'si dxej.

<sup>4</sup> Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yäl<sub>u</sub>rnibee te gunreni yäl<sub>u</sub>guxhtis. Dxejcti bahuiä xaim rebejn nani biru' yej<sub>u</sub>cni sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni

najc si'c manroga, dizareni nica' seen lo cuajreni nicla lo naareni. Gubansacreni loj rebengut, gurenajreni Jesucrist te laani gunibenajreni te mil ijz.

<sup>5</sup> Dee najc yalrbansac galoo lo rebengut. Niluxh stecuaa rebengut, direni guibansac che guisa'li te mil ijz.

<sup>6</sup> Chicbaa rebejn nani guibansac ganiddoo, najceni bendxan ni agubicaj xtolreni. Ni rojp yalgujt di guidazujn lojreni. Laareni sajcreni xpixhoz Dios nazja Jesucrist, sibenajreni Jesucrist, sinibenajreni Jesucrist te mil ijz.

<sup>7</sup> Che guiza' te mil ijzga, suslasacni Satans nen gabijl.

<sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog nazja reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo.

<sup>9</sup> Hua'preni lo te camp cadro gulagduxh. Gudaiyreni guideb gabig cadro rnibee rexpejn Dios nen guejdx nani sanalajz Dios. Per baxhal Dios bal guiboo xhaguibaali bitejbni, te guyejc guiragajreni.

<sup>10</sup> Dxejc bacuaareni bendxab nani biadgusguee rebejn lo bal guiboo ni cayecnaj sufr, lagajc cadro yu' manro, nazja profetxhii nani basguee; lo bal guibooga susacsireni sidejdreni trabawduxh dxej-yaal par tejpas.

*Yalguxhtis ni gujc nez loj tronronol*

<sup>11</sup> Dxejcti bahuia lo te tronronol nazja lo nani sobga' lojni te rujnni yalguxhtis. Nez lojni gunitlojli



guedxliuj nájza guibaa, xhetru lajtdi bidxäjł par laareni.

<sup>12</sup> Bahuiä lo rebęgut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcäl nabannäj Dios par tejpas. Dxejcti bejn ni yälğutxhtis rebęgut xcuent ni bejnreni, xcuenta rediidx nani caj loj reguijtzga.

<sup>13</sup> Guiranejz biäd rebęgut: nisdoo batzuug rebęgut ni yu' lojni, gabijł nájza yälğujt batzuugza rebęgut ni yu' lojreni. Dxejcti bejn Dios yälğuxhtis tejgareni xcuent ni bejnreni.

<sup>14</sup> Dxejcti bacuaani yälğujt nájza gabijł lo bal guiboo ni najc si'c te nisdoo te ro'c checreni par tejpas. Dee najc yälğujt ni rojp.

<sup>15</sup> Guiraa bejn ni di lajni nidxäjł lo xlibr yäl nabajn bacuaazani reni'c lo bajłga.

## 21

### *Xhaguibacoob nájza guedxliucoob*

<sup>1</sup> Dxejcti bahuiä te xhaguibacoob nájza te guedxliucoob, sa'csi agunitloj guibabiejw, nájza guedxliubiejw, luxh xhettiruza nisdoo.

<sup>2</sup> Narä Juan, bahuiä lo guedx Jerusaléncoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa.

<sup>3</sup> Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäi rebejn, anabannäj Dios rebejn, sajczareni rexpejn. Sibannäj lagajc Gueb Diosreni.

<sup>4</sup> Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajc chalilajz bejn rediidxre.

<sup>6</sup> Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yäl nabajn par tejpas.

<sup>7</sup> Chutis nani gun gaan lo dojl, sica'zani guiraa dee si'c yäl nasa'c, luxh narä sacä Xtiosni, laani sacni xi'nä.

<sup>8</sup> Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rni-ireni didxxhii, guiragajc reni'c sij lo nisdoo ni najc ganax bal guiboo, cadro rejc guiboo näjza sufr par tejpas. Dee ni najc yälgujt ni rojpp.

### *Guejdx Jerusaléncoob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

<sup>10</sup> Dxejcti bejn ni gunixcalä, huinäni narä lo te danro ni jiaduxh, ro'c baluiini loä te guedxro,

te guedxdxan ni laa Jerusalén, luxh xhaguibaali siädjiäjtne nez lo Dios.

<sup>11</sup> Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr.

<sup>12</sup> Guideb gabi guejdxga dejt te paderro cadro caj tzubitio'p xportonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejn Israel.

<sup>13</sup> Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäjw, yu'za chon portonga cadro räaz gubijdx.

<sup>14</sup> Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

<sup>15</sup> Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga.

<sup>16</sup> Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil tio'p gayuu kilómetros tejga laad. Sigajc siolni, sigajcza gulajgni, sigajcza jiaani.

<sup>17</sup> Dxejcti barejxni padeerga, yu'ni gayonbitajp metr seguñ mediid xten bejn, sa'csi ni'c najc ni cagutiexhnäjza anglga.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn.

<sup>19</sup> Recimient xten padeerga nac-chee guisa'c. Guiganid najc guijaspe; ni rojppga najc zafiro; ni riojnnga najc ágata; ni rdajppga najc esmeralda;

20 ni rgaiiga najc onix; ni rxho'pga najc cor-nalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzu-bitio'pga najc amatista.

21 Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihujn.

22 Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga.

23 Guejdxga dini guiquiin gusanij nicla gubijdx niclaza bäii, sa'csi lagajc xcärdimbicha' Dios näjza Xiil xten Dios ruzanij ro'c.

24 Rebejn guedxliuj ni rililajz xtidx Dios sajc sareni lo bianijga, luxh rereii ni siääd lo guedxliu-jre siädnäzareni xcälnibeereni, näj xpala'nreni ro'c.

25 Di ro' reportanga jiäuu rdxej, luxh ro'c xhettiza yääl.

26 Ro'c chanäzareni yäl\_nasa'c näj xpala'n regue-jdxro ni yu' lo guedxliuj.

27 Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl\_rusguee. Ro'c siu' ganaxduj renani caj lajni lo libr xten yäl\_nabajn par tejpas nani ca' Xiil xten Dios.

## 22

1 Dxejc baluui anglga te gueuro loä, cadre yu' nisyä xten yäl\_nabajn. Rdimbicha'ni si'c te guihujn, luxh cariini lo tron cadre rnibee Dios näjza Xiil xten Dios,

<sup>2</sup> rdejndni loj nezyujro ni rdejnd galäii guejdxga. Guiro'p laad gueuga sojb reyajg xten yälnabajn, lojreni rcaj tzubutio'p cuaa ninejxh neñ tebijz, tejga cuaani tejga bäii; luxh rebalajg ni rcaj lo reyajgga najc te gusiajcnì reben guedxliuj.

<sup>3</sup> Dxejcti ro'c xhettiru yälrdzubde, sa'csi ro'c yu' tron cadro rnibee Dios näjza Xiil xten Dios, ruzuxhijbza rexpejnìni, rajnreni laareni.

<sup>4</sup> Suhuiireni lojpacni si'cpac ni najcni, sicajza laj Dios lo cuajreni.

<sup>5</sup> Ro'c diru yääl chu. Luxh reni rbäjz ro'c di guiquuin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

### *Siäddzungajxh dxej ni guibisac Jesucrist*

<sup>6</sup> Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglìni te baluilojni loj rexpejnìni guira'ti nani agojl gac.

<sup>7</sup> —Sajngalu gan, siojb jiälä. ¡Chicbaa nani riu rediidx ni caj lo libbre!

<sup>8</sup> Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee.

<sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo libbre. Bazuxhib loj Diostis.

10 Dxejc najni loä:

—Na'c gusauulu guijtz cadro caj rediidxre xcuent nani churu gac, sa'csi asiäddzungajxh redxej ni chale'reni.

11 Luxh lal ni guidzujn dxejga, basaan suchanuu gun dol renani cayungajc dol; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza bennaya, si'cza chanuu gacni bennaya.

12 Gunajtiro:

—Siojb jiälä, luxh siädnaä xhi gunidxä loj tejgatu si'c ni riäl xca'tu xcuent dzuun ni bejntu.

13 Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

14 'Chicbaa renani riu xtidx Dios, najcreni si'c ni rguiib xhajbreni te sajc jiu'reni nez porton xten guejdxga, sajcza gauni ninejxh ni caj lo yajg xten yalnabajn par tejpas.

15 Per dejtz guejdxga chajia'n reni najc si'c bä'cw, nalajznu rebidxaa, renani rusguee chälben, renani rugu't sa'reni, renani ruzuxhijb lo rebanäjb, näjza ni rchagljaz rnii didx-xhii te gusgueeni.

16 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä te xajg torei David, nacäza si'c balxh-aguibaa nani rdimbidxa' cäjysi che gajd jianij lo guedxliuj.

17 Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädza chutis ni cayojl, sujiädyäxlia'ni nis yäl̄nabaj̄n par tejpas.

<sup>18</sup> Sa'csi narä rniliä'ppac lojtu, guiraatu ni riejn diajgtu rediidx ni caj lo guiitzre xcuent recos ni churu gac, palga yu' chu tejtu gutajlru diidx ni caj guiitzre, suteedru Dios bejn̄ga replaag yejcn̄i loj ni caj lo guiitzre.

<sup>19</sup> Palga yu' chu gudzucaj loj rediidx ni caj lo guiitzre, sudzucajza Dios nani nica'ni lo yajg xten yäl̄nabaj̄n par tejpas, näjza lo guedx Dxan, ni caj xcuentreni lo guiitzre.

<sup>20</sup> Nani cagusule' diidx xcuent guiraa redee gu-niini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiääd xcäl̄racnäj Dad Jesucrist lo guiraatu. Sugacni si'c.

**Xtidxcoob Dios ni biädinä dad Jesucrist  
New Testament in Zapotec, Mitla (MX:zaw:Zapotec,  
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

5cff1274-8dc3-5398-a94d-f6033bb363c9